

Et apres plusieurs causes proposiciōs ⁊ allegacions par le dict seigneur pro-
posces ⁊ allegues a lencōtre de sa dicte dame ⁊ seblablement aussi plusieurs
belles ⁊ bonnes causes et raysons par ycelle dame a son dict seigneur dictes ⁊
allegues. finalement par le grant sens belles ⁊ bonnes exortacions dicelle
dame le dict seigneur ycelles biē ouyes ⁊ proupensees fut contēt de soy supper
feter de la dicte vengeance. ⁊ telement se trouua a la fin que sa fille fut guerie ⁊
eut rayson ⁊ satisfaciō d son iniure ⁊ offence sans courrir a lespee ⁊ sans gaster
gēs ne pays ⁊ sās aucune violēce. ⁊ qui plus est ses enemis volontairemēt
et fracement luy firent rayson ⁊ demanderēt pardon lequel ilz heurēt volent-
tiers. ⁊ a la fin furent ⁊ demourerent bons ⁊ loyaulx seruiteurs ⁊ amis du dict
seigneur lesquelz depuis luy firent plusieurs grans seruices. ⁊ tout par le con-
seil de ladicte dame prudence comme plus au plain est contenu au petit liure
sur ce fait ⁊ cy apres escript au quel chascun trouuera q lire ⁊ entendre le vou-
dra plusieurs bonnes ⁊ notables raysons par lesquelles clerement on cognoi-
stra que cent mille foys on peult aduenir a satisfaciō de iniures et offences par
paciēce que par vengeance. Et pareillemēt aussi on entēdra par ledict liure plu-
sieurs bons ⁊ notables enseignemens faisans au prouffit du corps ⁊ de lame
de lonneur et des biens de ce monde. si vueillent doncques tous ceulx ⁊ celles
qui ycelluy liure liront mettre peyne ⁊ diligence de y bien penser ⁊ ymaginer ⁊
de mettre a execucion les bons enseignemēs en ycelluy liure contenus. ⁊ en ce
faisant viurōt en paix ⁊ prosperite de corps ⁊ de ame. ⁊ a la fin hauront la ioye
pardurable de paradis laquelle a chascun vueille ottroyer le benoit Jesus filz
de la vierge marie nostre sauueur ⁊ nostre redempteur par le merite de sa be-
noite passion ⁊ par sa sainte misericorde. Amen.

Ly finist le prologue
de melicee ⁊ de pru-
tence sa femme.